

文件第一 奏牘

人謀生計。方不致竭澤而漁。臣於光緒三十二年十一月
 初一日。請推廣農林。奉 上諭著各省督撫通飭各屬。詳
 查所管地方官民各荒。並氣候土宜。無論遠近。繪圖造冊。
 悉數報部。由農工商部詳定妥章。奏明辦理等因。欽此。至
 今數年。無一省奏報者。經農工商部兩次請 旨飭催。各
 省亦視若具文。擬請 明降諭旨。嚴催辦理。并請 飭令
 會議諸臣。詳籌推廣農林振興工藝辦法。分年列表奏明。
 認真舉辦。庶幾民利可興。用之不盡。孔子曰。百姓足。君孰
 與不足。是全在 陛下之維持扶助也。凡臣所言。關係安
 危至計。應請 旨飭交會議施行。不勝迫切待 命之至。
 伏乞 皇上聖鑒。謹 奏。

署湖廣總督瑞澂暫署湖南巡撫楊文

鼎會奏遵查湘省痞徒擾亂地方文

武各官辦理不善情形分別參辦摺

奏為遵 旨會同查明湘省痞徒藉飢擾亂地方文武辦
 理不善詳細情形。分別參辦。恭摺據實臚陳。仰祈 聖鑒

事。竊臣瑞澂承准軍機處電傳三月初九日 諭旨。瑞澂
 電悉。昨已有旨派楊文鼎暫署湖南巡撫。馳往該省。嚴拿
 亂徒。一切善後事宜。會同該署督妥速籌畫。並將辦理不
 善各官查明參辦。現在大局雖已少定。著遵前旨嚴拿首
 要。解散脅從。所有辦理不善之開缺巡撫岑春煇。及該管
 地方文武各官。均著會同認真查辦。善後事宜。尤須妥慎
 籌畫。以靖地方。至東西各國官商教士。務飭妥為保護。以
 免疏虞。欽此。又准開缺湖南巡撫岑春煇電傳。奉軍機處
 電傳三月十二日 諭旨。瑞澂岑春煇奏悉。所參之郭
 中廣等各員。著瑞澂楊文鼎再行覆查具奏。其各屬州縣。
 應通飭認真防範。毋任再生事端。欽此。仰見 朝廷惠民
 戡亂。懷柔遠人。考核情罪。務歸允當之至意。欽悚莫名。臣
 瑞澂自接湘省警報後。一面調派水陸兵隊赴援。一面即
 密派文武幹員。馳往分投密查。臣文鼎抵任後。一面將購
 糧辦匪。暨布置善後情形。先行電陳。仰祈 聖慮。一面博
 訪周諮。於此次亂事始末原委。具悉其詳。證諸臣瑞澂訪

查所得。亦屬相符。謹會同將實在情形爲我 皇上縷晰陳之。緣湘省素爲產米之區。從前米價。至貴不過四千餘文。近來銀貴錢賤。百物奇昂。米價亦因之增長。上年岳常澧等屬水災。米穀失收。又以鄂省沿江濱湖州縣。被災甚重。萬不能遏。籩自封。自冬徂春。採運既多。省城米價。每石漸漲至七千餘文。開缺撫臣岑春煇體察情形。知救災恤鄰。勢難兼顧。遂於二月初奏蒙 俞允。禁止米穀出口。按照條約。應自宣禁之日起。扣足二十一天。方能實行停運。此二十一天中。華洋商販爭相購運。米穀出口較多。米價驟漲至八千五六百文。當奏禁之初。岑春煇卽已督飭司道地方官。籌議減價平糶。責成巡警區官。查造城廂貧戶丁口細冊。以爲開糶張本。並令各鄉清查團穀。各就各團籌辦均糶。正在分投催飭趕辦間。三月初三日午後。南城貧戶以覓食維艱。聚衆至赦山廟巡警分局。要求早開糶廠。人多口雜。擁擠喧譁。署善化縣知縣郭中廣出城彈壓開導。告以平糶須先查戶造冊。現戶冊將次造齊。一俟覆

文件第一 奏牘

查清楚。卽可開糶。務各安心守候。勿生事端。衆人亦卽解散。初四日。岑春煇以愚民聚衆。必有痞徒鼓煽。何以巡警局不早訪拿。當將巡警道賴承裕申飭。適是日早巡警公所在南城外拿獲滋事人劉永福一名。解送城內巡警公所收押。民間以爲公衆請求平糶。並未犯法。何致遽出捕人。隨復聚衆向赦山廟警局索還被捕之人。勢甚洶洶。署城守協副將楊明遠。長沙縣知縣余屏垣。善化縣知縣郭中廣聞報。先後出城彈壓。並當衆曉諭。官所捕人。須訊明情節。分別辦理。並不重懲。衆謂米貴若此。食力之民。日事工作。今被收押。其家勢將餓斃。情願當場責釋。不願由巡警局拘繫廢時。兩縣以其言尙近情。允許照辦。派人至警務公所提回。而巡警道賴承裕。甫被撫臣申飭。且以被捕之人。一經聚衆要挾。便准省釋。亦非政體。堅持不允。民間見往返數次。人未提釋。不免惶急。痞徒從中播弄。衆憤益深。該道聞衆聚不散。遂親率隊馳往彈壓。諭以如不解散。當照亂民懲辦。時衆已聚至數千。不服開導。痞首王大漢

等即將賴承裕扭辦兇毆。城守協楊明遠奮前救護。以身擁蔽。頭面亦受毆傷。長沙善化兩令。時正在場大聲喝禁。衆謂與縣主無干。將其格開。隨帶差勇。亦皆嚇散。無可如何。嗣巡警道之護勇。見事危急。脫去號衣。混入人叢。詭言將賴承裕解送撫轅。遂昇賴承裕由間道避匿。時已昏黑。衆隨其後。不知被詎。遂爭赴巡撫衙門。喧嚷騰聚。藩司莊廣良聞信趕到。臬司周儒臣。長沙府知府汪鳳瀛。是日正在學司署考試司法研究所紳班學員。聞警亦即馳往。其餘文武及兩首縣。相率踵至。同向大衆剴切開導。無如人聲鼎沸。語不能聞。昏黑之中。誰何莫辨。撫署衛隊抵攔不住。轉被痞衆磚石擲傷無數。岑春冀急懸牌示。准明日平糶。每升減價至五十文。衆仍不散。隨將頭二門衝毀。湧至大堂。司道請開槍示威。岑春冀恐黑夜多傷人命。不肯應允。首府請去鉛彈。但放空槍。齊隊衝出。岑春冀恐倉卒間軍士彈不盡去。仍多誤傷。直至無可如何。始命軍隊用槍桿驅打。衆乃退出轅門。猶聚不散。聞痞徒挨家傳話。勒令

明日全城罷市。其時已分派常備軍及巡防隊。分投保護各署庫各局所各教堂。以爲之備。四更後。撫署前衆已退散。而亂民爭向各碓坊。以官平糶價強糶穀米。霎時間。各碓坊存米被搶一空。初五日黎明。岑春冀卽飭首府縣邀同郡紳。在席氏家祠傳集城廂各都團總。各碓坊米鋪。公議急糶辦法。令各碓坊暫向官倉領穀。碾米出糶。每穀一石。作價二千文。准糶後繳價。糶價每升減至四十文。俟官設平糶局開辦日爲止。並令各街團總家諭戶曉。各自約束子弟傭工。不准出外滋事。官紳正在議辦團防。商量善後事宜。忽聞撫署前衆又圍集團圍。拆牆毀屋。縱火焚燒。經常備軍開槍抵禦。擊斃數人。亂民猶抗拒不退。就中有外來匪徒。乘機分往各處教堂學堂。拆屋縱火。每至一處。尾隨之人。填街塞巷。分防兵隊。無從辨別良莠。又未奉有命令。不敢開槍。致痞衆任意猖獗。其時地方官步行街衢。向衆勸導解散。咸置不聞。紳士又以撫臣信用已失。迫令藩司示諭。岑春冀見衆怨萃於一人。似專與撫臣爲難。遂

電奏自請治罪。懇 恩飭派藩司護家。一面循紳士之請。權令藩司莊廣良以巡撫名義署銜出示。直至申酉之間。亂民始漸離散。撫署大二堂及附屬羣房。概被焚燬。餘燼猶熾。幸各處防護軍隊當事機急危之時。竭力將日本領事官各國教士各學堂教習護送出城。得保無恙。不意夜間城外四處火起。城內兵隊無多。分防各要地。勢難抽撥。又在深夜。未敢開城出敵。而城外駐泊之師船軍隊。亦以分地扼紮。兼顧為難。致大西門外商埠稅關洋行貨棧。盡船焚搶多處。其北門外之英領事公館。近小西門之日清公司等所。經地方文武盡力保護。幸免波及。初六日清晨。大西門外亂民猶復屯聚喧嚷。紛紛搶劫。並得警報。匪徒將渡至對河水陸洲。焚燒稅務司理船廳各公館。及搶劫省城紳富之說。紳士大恐。會集席氏。商議定亂方法。始主用重典之說。長沙府知府汪鳳瀛請於藩司。馳至撫署。調取巡防隊四十名。偕同管帶徐振岱出城。飛渡至水陸洲。據稅司公館告稱。匪徒先來探視。定期午時放火。今見

文件第一 奏牘

官軍趕到。當可無虞。隨派隊四出巡邏。匪已逃散。因續調巡防隊二十名。分別守護稅司船廳公館。遙見大西門火場喧聲震天。異常紛擾。因率隊二十名。渡回省岸。適候補道胡得立帶隊巡哨出城。遇別隊弁勇拿獲搶犯二名。胡得立即飭當場正法。汪鳳瀛徐振岱率隊同時趕到。兩面驅逐捕拿。亂黨始一闕而散。其時長沙縣亦拿獲匪犯三名。訊明立在署前正法。城內外於是大定。此初三四五六等日。亂民擾害地方。經獲犯正法。始克平靖之實在情形也。臣等查此次湘民肇亂。當要求平糶時。尚係貧民。迨至放火焚署。則全係亂民游匪。良由湘省生聚繁多。從前湘軍徧於各省。生計較舒。近來各省改募徵兵。湘軍撤遣回里。半多游手失業。最易生事。又泥木兩項工匠。素來蠻橫。近因省城建築各項工程。為外省匠人包攬。心益憤恨。恰值飢民起衅。痞徒煽惑。遂爾附和。其間。又有外來游匪餘孽。乘機肆擾。不謀而合。遂致一發不可收拾。釀此大變。幸賴 朝廷威德。鄂省所派軍隊。即於初七日馳援抵省。始

文件第一 奏牘

能鎮定大局。安堵如常。省城地方文武各官。事前疏於防範。臨時因應失宜。均屬咎有應得。惟其中尙應分別核辦。以昭公允。除開缺撫臣岑春煊已經奉旨交部議處外。查巡警道賴承裕。操切偏執。肇衅釀患。鹽法長寶道兼長沙關監督朱延熙。遇事庸懦。應變無方。長沙協都司貴齡。左營守備周長泰。消防所所長遊擊龔培林。警察委員知縣周騰。保護不力。均擬請一併革職。藩司莊廣良。在湘年久。民生疾苦。應已周知。辦理賑糶。是其專責。乃平日未能和衷商辦。預先籌畫。迨匪徒擾亂。措置亦有失當之處。殊難諉過。擬請旨開缺。交部議處。兼署學司臬司周儒臣。長沙府知府汪鳳瀛。長沙縣知縣余屏垣。善化縣知縣郭中廣。身任地方。亦難辭咎。惟平日官聲尙好。現在辦理善後事宜。亦頗敏慎。自應分別辦理。周儒臣汪鳳瀛均擬請交部察議。余屏垣郭中廣均擬請革職留任。藉示薄懲。署長沙協副將楊明遠。當匪亂時。保護外人。甚爲出力。查拿匪犯。亦能認真。功過並足以相抵。惟究有彈壓緝捕之責。

七十

五月

擬請摘去頂戴。勒令捕匪。以觀後效。中軍參將連陞。先期派赴岳州。截阻米穀出境。並未在省。應免置議。除撤任各員。派委接署。並將籌辦善後各事。另行奏陳外。所有遵旨查明湘省匪亂始末情形。及查辦文武各官分別懲處緣由。是否有當。理合會同恭摺據實具陳。伏乞皇上聖訓示。謹奏。宣統二年四月十九日奉 硃批另有旨。欽此。

署湖廣總督瑞澂奏特參籍紳挾私釀

亂請分別懲儆摺

奏爲特參在籍紳士挾私釀亂。請旨分別懲儆。以肅綱紀。恭摺仰祈 聖鑒事。竊維治世以禮。定亂以法。而遏亂之萌。尤在禮法修明。庶幾綱紀以立。湘省自咸同軍興以來。地方官籌辦各事。藉紳力以爲輔助。始則官與紳固能相和。繼則官於紳。遂多遇事優容。馴致積習成弊。紳亦忘其分際。動輒挾持。民間熟視官紳之間。如此侵越。亦遂藉端聚衆。肆其要求。於是闕堂圍署。時有所聞。而禮法